

*Transcriptie Jeanne van der Krabben-Verkooyen*

**BHIC 's-Hertogenbosch  
Commanderij Duitse Orde Vught  
Inventarisnummer 147  
Overeenkomst met timmerman**

1615, 20 Maj

Accoord

aengegaen met Peeter Zone Peeter  
Goessens belangende de Timme-  
ragie der St. Lambrechts Kercke  
tot Vucht.

Alsoo op den negensten dach van April inden  
iaere sestienhondert en vijftien, heer Jan Eelkens pastoor,  
Adriaen Vrancken, herman Vos, ende Willem ianssen kerckmeesteren  
van St. Lambrechts kercke tot Vucht, de selve kercke  
openbaerlijck hadden verpacht ende bestelt te timmeren  
onder zeker conditien, in de voirwaerde daer van gemackt  
begrepen: Ende dat dieen volgende Michiel janssen  
molenmaecker met wtganck der brander kerssen daer aen  
gebleven was: Soo eest (?) , nochtans niettegenstaende  
dat hij tot verscheyden reijssen, minnelyck ende ooyck gerechtelyck  
versocht sijnde om de voirschreven voirwaerden te voldoen, ende  
behoorlijcke borge naer inhoud des selven te stellen,  
gebleven is, ende al noch is blijvende in gebreke van  
tselve te voldoen, hebben daerom de voirschreven verpachteren  
met Peeter zone Peeter Goossens (dien den voirschreven  
Michiel het werck ontslagen hadde) zeecker accoord  
aengegaen belangende de timmeragie der voirschreven kercke,  
Te weten dat den voirschreven Peeter sal gehouden sijn  
ierst voor al de voirschreven kerckmeesteren ende verpachteren  
costeloos ende schadeloos te ontheffen (?) tegen den voirschreven  
michiel janssen van allen actien, questien ende geschillen  
die den voirschreven michiel tegens de voirschreven verpachteren  
ter oirsaecken van den palmslach bij hem van desen wercke  
ontfangen, ennichsints soude willen pretenderen, moveren  
ofte querelleren, ende allentgene dat ter oirsaecke  
van dieen soude mogen oprysen, sonder coste, schade  
oft moeten van de verpachteren, over hem te nemen.

Item dat den voirschreven Peeter de voirschreven kercke wel  
costelyck ende deugdelyck sal optimmeren, wegens de  
voirwaerde ende conditien in dato voirschreven daer op gemaect  
ende al onbegrepen naer heysche vande werck. Ende voir  
dese timmeragie sullen de voirschreven verpachteren den  
voirschreven Peeter geven die somme van seventienhondert  
ende twelff gulden eens te betaelen volgens de voirschreven  
voirwaerden in drie termijnen. Wel verstaende nochtans

dat de voirschreven verpachteren aen den lesten ende dorden termijn  
sullen corten ende afftrecken de somme van hondert  
seven ende dertich gulden die den voirschreven Peeter Jan  
Claessen door slaegen ende leegen int ophangen der  
voirschreven kercke is schuldich geworden.

Pag. 2:

Ende als den voirschreven peeter de voirschreven kercke voor  
Sint Jacop naestcomende over een iaer sal getimmert  
hebben, sal men hem tot het richten alnoch accommoderen (?)  
met de somme van tweehondert gulden, die sullen  
strecken tot affcortinge van den tweeden paije (?)  
hier voirens gelooft. Item naer dat den voirschreven Peeter  
int maecken van de voirschreven kercke hem wel ende getrouwelijck  
sal gequeten hebben, alsoo dat de verepachteren hem sullen  
hebben te bedancken, sullen sy boven de voirschreven gementioneerde  
somme aen de huijsvrouw des voirschreven Peeters alnoch  
schencken ende geven vijftich gulden eens, elcken gulden  
gerekent tot twintich stuijvers brabantsoo de selve  
binnen 's-Hertogenbossche als dan ganck ende cours  
hebben sullen. Allen het welcke de voirschreven verpachteren  
van wegen de voirschreven kercke ende den voirschreven Peeter ende  
met hem Peeter goossens synen vader ende Roess (?) geritsen  
van Vechel synen schoonvader voir hem selven als  
schuldnaeren en principael, ende een voor al op verbijtenisse  
van hennen persoon ende goederen hebbende ende vercrijgende  
hebben gelooft onverbreeckelycken te onderhouden ende  
te voldoen sonder bedroch, archlist, list in presentie  
van de eersame personen Jan Loeff, ende mr. Jan laureijnssen,  
Teunis Selkens als getuijgen ende poirteren der stadt  
van sHertogenbossche hier toe geroepen ende gebeden  
den xxen maij inne den iaere xvi en vijftien.  
Onderstont Peeter Peeters timmerman, Peeter Peeter  
Goossens timmerman, met den mercke, Bij mij Roess (?)  
geraertssen, Johannes Selkens Pastor ad D (?) Lambrechts in Vucht  
herman Vos kerckmeester, Willem Janssen kerckmeester met syn  
marcke, J.Loeff (?) vande Sloot als getuijgen, ..anquam  
testis Laurentij Jeunis Selkens als getuijge, ende  
my Bartholomeeus Wijtfliet notaris geadmitteert inden  
rade van Brabant, tgeens voorschreven is onder myn gewoonlyck  
hantteeken confirmerende. B. Wijtfliet, notaris.